

## Yemesi

Yemesia Yisasina aganaamo mani avona kae-malene. Yemesia Yelusalemu maineya Yisasina amakua aminaya veate kava kano maineanagino nepuamoa Yisasia faliteno hetino ikapinaga haitegeno Yemesia sevetinia (17) kafu agava maineno Yemesi kea kae-malene.

<sup>1</sup> Nagaya Yemesinae Anumaya Kotiene Anumayati Yisasi Kalaisiene aliya kanoanimona mani autama kaena kuma aepatamima ataletamama alu mopalega umainaya Isaleli veamogatamihe mani avona kaena nelamamina kanale mainafio huna hu falu fala hu nelamatoe.

*Aye lamavataga hisia yamoa tamakaila alino lokiya vai-lamategahie.*

<sup>2</sup> Nafunagana-gatamae nagoa kana yama tamakaitema falote hisigetamahena ma lamakesa haviho Inamona musekase hisuna yane. hutama hiho. <sup>3</sup> Kana yama falote hulamateana Anumaya Kotia Tamametitima nehaya yana agola nehafi havige nehafi? huno tamakegahe ani kana yana tamakaitela falote hu nelamateafe tokiya vaisaya yamoa anifiti falote hugahie. <sup>4</sup> Mukia kanafina tokiya vaisaya yamoa tokiyaagama hisiana Anumaya Koti aufina Kosa helamatene. huno hinagetama ala veanegeya maigahae.

*Nago kanomoa agaia kanale agu agesa havisia yama omalesigenoa Anumaymoteга havigesigeno amino.*

<sup>5</sup> Nago kanomoa amunotamifitima kanale agu agesa havisia yafema ati yenunofena Anumaya Kotiteга havigesigeno amino. Anumaya Kotia ayaaya ayaene kano maineanagino mukia veamogaminakea oamama-kigahianagino afaa mukia yana amamigahie. <sup>6</sup> Amamigahigi Anumaya Kotia agu agesamoma havisia kavala tamage huno hugahie. huno havino agupi male-neno havigesie. Maa agesa ohavisie Kema hisua yana namigahifi onamigahie? huno tolefina agesa ohavino. Tole agesama havisia kanomoa yasimoma hage lima alino vai-lagaitalea augafa kava humaine. <sup>7-8</sup> Tole agu agesama hanesia kanomoa nagoke katela novigi alu kapi alu kapi agoya mo vaige me vaige huno vai neayeno Afaa namigahie. huno agesa nehavianagi Anumaya Kotia naa veamogamina nagola osi ya kanoa oamamigahie.

*Yemesia afenoamima omalenea veanene afenoamima hanea veaneneфе kea humaine.*

<sup>9</sup> Mone afenoamima omale veamoya Anumaya Kotifena haviya amakupi malenayafenagiya mage huya hisae Anumaya Kotia tavalesaga huno Nagai nafaneyagae. huno humaine. huya tusi muse hisae. <sup>10</sup> Muse hugahagi kasagoya moneamima hanesia veamoya yosa ausemoma heno hali hulavia ya kana huya aletesayafe Anumaya Kotia alime tavino amatesigeya afa vea kana huya maisayafe musena hisae. <sup>11</sup> Yagemoa

evayi huno tokiyaage yagema leana ani tala yana leno mukia fayotegeni auseamoa asaga hu lavino haviya nehia avamete huya mukia moneamima nemalesaya veala ani mone alisaya yaamimo amunopi maineya faligahae.

*Anumaya Kotia kanale kava hulateni lavaleno kefo yapina notate.*

<sup>12</sup> Nagoa veamogamitema kana yama falote hisige ya tokiyama vaisayana anonaamia Anumaya Kotia hano ohuno agola maige maige hisaya hamaimula amamigahie. Ani muse yana Anumaya Kotia agaifema hamau ayamopafi nehamaiya veamogamina Amamigahue. huno hu lokiya vai-maleneafe musena hisae. <sup>13</sup> Havi kavala hiho. hunoma nagoa veamogamina amavayu hisigeyahena ani veamoya Anumaya Kotia aye lavataka higeta mani kavala nehune. huya ohiho. Kefo yamoa Anumaya Kotina avayu nohie. Anumaya Kotia nagoa veala avayu huno Kefo kavala hiho. huno nohie. <sup>14</sup> Nohianagi tagaiti nagoke nagokemogata age lahaye hu yana taipafiti falote huteno aye lavataga huno tavayu nehie. <sup>15</sup> Age lahaye hu yamoa amu maleteno aihefa nehea avamete humaine. Amu maleteno kefo yamoa falote huteno ala higeno kefo yama huge huge nehaya veamogamitela fali yana falote hu neamate.

<sup>16</sup> Nahau nayamopafi nahau-mainea nafunagana-gatama havigu Anumaya Kotia aye lavataga higeta kefo yana nehune. hutama hisagi. <sup>17</sup> Mukia kanale yana hale yamona Nefaa ikapinagati nelamie. Yagemo amemoa molino

ayaaya huteno melino aupa huteno nehia kavala Nelafa ohune. Alu kava alu kavaenena nohie. Nagoke avamete kavakeya nehia kano maine. <sup>18</sup> Anumaya Kotia mukia yama talo hu-malenea yapi uhagoteta maisunafe Anumayamoa agaia haiya kava huno kelamage kealeti tagaila agaia nafaneyaga ago alino latene.

*Tagaya kea nehavita akave malesune.*

<sup>19</sup> Nahau nayamopafi nahau-mainea nafunagana-gatama kema hisaya kea aupaa haviho. Ke ohutama mainetama aupaa tamahaiya ovaino. <sup>20</sup> Veamogatama tamahaima vaisaya yatetila Anumaya Kotina aufina fatago ohugahie. <sup>21</sup> Ani yafe mukia kefo yana tamakaveno hutetama tamaugafa alitama ohaitama Anumaya Kotia kema tamakupima fai-malenea kea havilama hutama haviho. Ani kemoa tamaku tamamena aligatisia ke hane. <sup>22</sup> Kanale kema havitetama akave omalesayana afa ya kana nehagi afaama havitetama atalesayana tamakaitami tamaku nafanemona aye vataga nehae.

<sup>23-24</sup> Nagoa veamoya Anumaya Koti kea haviteya akave omaleya atalesageya nagoa veamoyama galasifima amaugosa ageteyagi ago neataleya age hatayo hatayama nehaya avamete kava nehae. <sup>25</sup> Nehayanagi nagoa veamoya Anumaya Kotina kanale kealegama ageke huya nemaiya veamoya ani kea havigeya oataleya akave nemalaya veala naama haya yafe Anumaya Kotia musema hisaya amaku amakesa amamigahie. Ani kemoa fatago huno kefo

yamoma haya kimainea yana ali kalu hetalenea ke hane.

<sup>26</sup> Haneanagi Tagaya kanaleya huta tametitia nehune. huya hisayana veamoya amavefunamona kava oyagaiya amakaiami amakuamona havige ayevataga nehayanagino amametiti nehaya yamoa afa ya kana humaine. <sup>27</sup> Nehigi Anumaya Kotia Nelafa aufina nagola tusia kanale tametiti hisuna yana mage huno hane. Megusa anagala havi no nemaiyafe amaya nehuta kama vaiyesuna yatela kava yagaisune. Havigu ma mopafi kefo yama hisunana Anumayamo aufina taguamoa oniyaage hugahie.

## 2

*Mukia veamogamina nagoke avamete amaya hisune.*

<sup>1</sup> Nafunagana-gatama tokiya hale-mainea yaaene kanoa, Anumayati Yisasi Kalaisife havitama tamakupi maletama tamametiti nehayafe amakima hanesia veamogamina kanaleya hu neamatetama afa veamogamina hu-haviyama humatayana havi kava nehae. <sup>2-3</sup> Yisasi kema havigahe melitalu nehisagenoma nagola monea kasago hu-mainesia kanomoa kanale kena fai-lino tamakaipi evayi hinageno nagola monea omaleno kenaamoa hatata hatatu hu-mainesia kanoma anile evayima hisigetamahena tamakaya moneama hanea kanomofena hutama kanale hutetama mage nehae Kagaya ma kanale siale emaiyo. hutama nehayanagi moneama omalenea kanomofena mage nehae Amuale hetika maiyo. nehutama

Naiyafi mopale emaiyo. hutama hu neatae. <sup>4</sup> Ani kavama haya kavala tamakaitami havi tamaku tamakesa nehavitama tamafu-tamakana-gamina fako hu neamatae.

<sup>5</sup> Nahau nayamopafi nenahaiya nafunagana-gatama haviho. Ma mopale veamogami amaufina afenoamima omale veamogamina Anumaya Kotia ago hapali-mateno agai kema haviya amakupi maleya amametiti hisaya yana kasagoya neamamino Nagaifema hamau ayamopafi nehamaiya veamoya visaya kumala, nagaya kava yagaisua kumate umaigahae. huno hu lokiya vaino hu-matene. <sup>6</sup> Hu-matenegi

tamakaya afenoamima omale veamogamina amakaye hisafa kavala ago hu-matenagi afenoamima hanea veamoyage tamakaila aliya afepi nelamateya kaiyekema hulamatesaya yatela tamavaleyana nelamatae. <sup>7</sup> Yisasia,

tamakaila agaialega lamatenea kanomona kanale agia anima moneamima hanea veamoya hu-haviya hu neatae. <sup>8</sup> Anumaya Koti autamafina nagola kahegi kea mage huno haneane

Kagaikaa kaugafahema kahaisia avamete negafu augafahena kahaino. huno hu-maineane.

Tamakaya ani kahegi kema akave malayana kanale kava nehae. <sup>9</sup> Nehagi tamakaya nagoa veamogamina kanale kava hu neamatetama

nagoa veamogamina tamakavenoma hu-matayana kefo kava nehageno kahegi kemoa mage nehie Kea ali tagaetama kefo kava nehae. huno nehie. <sup>10</sup> Nagoa veamoya mukia kahegi

kema akave nemaleyana nagoke ke kanoama aliya atagayayana mukia kahegi kea ago ali

atagae-mainae. <sup>11</sup> Anumaya Kotia mage huno hu-maineane

Anea amavayu hutama kumaiya oheho. huno nehuno nagi Nago kanoa hetama ofaliho. huno hu-maineane.

Nagi anea amavayu hutama kumaiya ohene-sayanagi nago kanoma hetama falitesayana Anumaya Koti kahegi kea ago alitama atagae-mainae.

<sup>12</sup> Kefo yamoma nofi kilatenea yana ago alino kalu helatenea kemoa kaiyekea hulateno fako hugahie. Ani yafe mukia kanafina kema hisaya yaene maisaya auava yaene ani kemoene nagopi maiho. <sup>13</sup> Nagoa veamoya veafema kalagima ai oamatesayana Anumaya Kotia ani veamogamina kaiyekema humatesia yupa kalagila ai oamategahie. Kalagima ai neamatesaya veamoya ani kanafina keamimoo kanaleya hinageya kanaleya huya maigahae.

*Tamametiti yamoma kanale auava yama ali falote ohisiana afa ya kana humaine.*

<sup>14</sup> Nafunagana-gatama nagoa veamoya Tagaya Yisasife havita tagupi maleta ago tametiti hu-mainone. nehuya nagola kanale auava yama ohunesayana anima amametiti nehaya yaamimoo amaku amamena ali okatigahianagino afa ya kana hugahie.

<sup>15-16</sup> Tamafu-tamakana-gamina kenaamima hoyaaamima omalesigeya esagetama tamakai amunopitila nagoa veamogatama mage hutamama hamapaisayana Afaa viho. Yasi siota tamakaitami nealitama kavela tamakaitami negeno tamamu hino. hutama hisayana kaveene kenaamiene amaya ohunetama kegeyama

hisayana ani kemoa amamu ohugahigi ani kegeyana hu oamatetama amaya hiho. <sup>17</sup> Yisasife havita tagupi maleta tametiti hu-mainone. hutama hu-mainayanagi afaa mainetama kanale kavama ohisayana tamakaila tamametiti yatamimoo afa ya kana hugahie.

<sup>18</sup> Nagoa veamoya mage hugahae Kagaya Yisasife havika kagupi malenanagi nagaya kanale aliyania nealue. huno hisigena mage huna hugahue Kanale auava yama ohisanana hanaa huna Yisasife havika kagupi malenana yana agegahue? Nagaya kanale auava yama nehua yateti Yisasife havina nagupi malenoa yana kaveligahue. <sup>19</sup> Kagaya kanaleya huka Nagoke Anumaya Koti maine. huka kametiti nehananagi Kefo Avamumoya ania huya Anumaya Kotia maine. huya amakupi maleya atalia nehae. <sup>20</sup> Kagaya kagesa omale veamoga menia kavelisue. Nagoa veamoya Yisasife havita tagupi maleta tametiti hu-mainone. huya hisagenoma kanale auava yaamima falote ohisiana anima amakupi malenaya yamoo afa ya kana hugahie huna nagoene kaveligahue. <sup>21</sup> Nayona Apalahamu, taginagomoo, Anumaya Koti kea akave maleno muse yama amigahena nafanea, Aisakina, avaleno yafa folamole ateneno hegahe nehigeno Anumaya Kotia aniam hia yana ageteno Fatago kano mainane. huno huteneane. <sup>22</sup> Ani yafena ago havilinae Anumaya Koti kema havino agupi maleno ametiti humainea yamaamoene kanale aliyama ali-mainea yamaamoene ailokaeana alimainae. Ani kanale aliyamaamoo agupi maleno



ametiti hu-mainea yamaamona alivaya aye-  
maine. <sup>23</sup> Anumaya Koti avopina mage huya kae-  
malenayane

Apalahamua Anumaya Koti humainea kehe  
Tamage nehane. huno agupi maleno  
ametiti hu-maineafe Anumaya Kotia  
agaifena mage huno hutene Fatago kano  
mainane. huno huteneane. huno kae-  
maleneane.

Apalahamua ani aliyama ali-mainea kanafi mani  
kea kae-malenea kemoa agola falote huno tam-  
age humaine. Anumaya Kotia Apalahamufena  
Kagaya nagaila name kafa mainane. huno hu-  
maineane. <sup>24</sup> Tamakaya haviho Anumaya Kotia  
agaifema haviya amakupi maleya ametiti hu-  
mainaya yafekeya ageteno Fatago veane mainae.  
huno hu omategahigi kanale aliyaenema ali  
lokaeya alisayana Anumaya Kotia Fatago veane  
mainae. huno hu-mategahie.

<sup>25</sup> Yosuaa Ko mogeho. huno Yuta vayala hu-  
mategeya vageno Lehapua nomaafi amavaleno  
amateteno amaugafa aligatino alu kate hu-  
mategeya umainae. Naama humainea yafena  
Anumaya Kotia Lehapufena Fatago a mainane.  
huno huteneane. <sup>26</sup> Nagoa veamoya amaku  
nafaneamia atalageya Ago fali-mainae. huta ne-  
hunanagi nagoa veamoya Yisasife havita tagupi  
maleta tametiti hu-mainone. huya nehayanagi  
kanale aliyaamima falote ohisiana amakupi  
malenaya yamoa ago faliteno afa ya kana hu-  
maine.

*Kema hisuna yatela kava yagaisune.*

<sup>1</sup> Nafunagana-gatama havigu tamakai amunopiti kasagoya vayamogatama Hu-maveli ha-maveli hisuna vaya maisune. hutama huyafenagi ago havimainone Anumaya Kotia haenagaa tisa vayamogatina tusiya huno kaiyekea hulateno fako hu-lategahie. <sup>2</sup> Tagaya mukiamogata kefo kavala nehunanagino nago kanomoma havigema nohisia kanomoa ala kano maineno kanaleya huno agaia augafalela yagaigahie. <sup>3</sup> Inagi hosi afumo avayafina aeni nofiteti kitama hu-mataya yamoa Tagai tagu tagesa akave maleno vaiyesie. huta maleteta mukia augafa moli augosa meli augosa hunageno augosa huno alu kate katela nevie. <sup>4</sup> Nevianagi tamakaya tipi kaleneffe tamakesa haviho. Tipi kalea tusia yakefa haneanagino tusia yasimoo fu huno ayetu-feno neunoma moli hao meli hao hunoma nevia kayomaa osi ya kanoa hanegenoo tipi kalema nealia kanomoo ani kayote alino mo aiyahae me aiyahae higeno ani ala tipi kalemoa ani katega nevie. <sup>5</sup> Naa hu-maineanagi tavefunamoo osi ya kanoamoogi Alu kava alu kavala hugahue. huno ala kegefa nehie. Ageho osi ata kanoamoogi tusiya huno tala yaeneteno mukia yosayagaene neasagalie. <sup>6</sup> Tavayamoenena ata kana humane. Taiya tayaene mukia laugafaene haneanagi tavefunamoo amakaseno tusia havi ya haneanagino mukia laugafamona avaleno kefo kapi neate. Haniki yapi tegelege nehia atamoo mani ata kae-maleneanagino nafane mainona

kanaleti ani tavefunamoa ata kana huno tagaila ali haviya hu nelate.

<sup>7</sup> Yaga, kafa, nama, osifavea, mukia tipima mainaya yaga kafa, nagoa veamoya atafa huya amatenageya yuna nehae. <sup>8</sup> Yuna nehayanagi nago kanomoa amuha ohuneanagino agaia avefunalela kava yagaino alino yuna ohegahie. Mukia kanafina atalenegeni tavefunamoa ase ohu kea nehatageafe tavefunafina kasagoya analisa kana ya hane. <sup>9</sup> Tavefunamokeya Anumaya Koti agia alisaga nehunoagi Anumaya Kotia agaia augafa kali-mainea veanema talo hulatenea veafenagi ani lavefunamoa hu-haviya hu neate.

<sup>10</sup> Nagoke tavayafiti Anumaya Koti agia alisaga nehuta nagoa anagatimofena hu-haviya hu neamateta nehune. Nafunagana-gatama havigu ani kava huyafenagi ania ohiho. <sup>11</sup> Kapaima hagea timoa mopafitila falote nehianagi hagaage tiene atuage tienena nagoke yapitila falote nohiafe tamakaila ania huno nagoke tamavayafitila havi kene kanale kene falote ohisie. <sup>12</sup> Nafunagana-gatama, hagaage yosalagama neayea yosamoa atuage yosalaga oayegahie. Fulutu nofipitila atuage nofi alaga falote ohugahie. Ania huno hage lipitila kanale hagaage tina falote hileasino? Ania ohugahie. Tavefunamoa kanale kene havi kene ohisie.

*Kanale amakesa havisaya yana Anumaya Kotitegati emaine.*

<sup>13</sup> Tamakai amunopima mainaya veapitila kanale agu agesaene veama mainesayana amau-gafa aliya ohaiya kanale auava kavakeya huya vai neayeya kanale amaku amakesa tamave-liho.

<sup>14</sup> Tamave-lisagetama nagoamogamife tamaipa haviya hisageno tamakaitami hisaya kemo tamahai vaisayana kanale kemona ali tagaetama havigegeya nehutama Kanale tagu tagesaene veane mainone. hutama ohiho. <sup>15</sup> Naa lamaku tamakesama haviyana ikapinagatila elavino omenegi ma mopafi ke hane. Alu Aotage Avamumoa ani kea nohigi ani yamona nefaa Satani maine.

<sup>16</sup> Vayafena tamaipa haviya hu neamatetama tamakaitami keleti tu hutama tamahai vaitama ke ovai avai nehutama havi kavakeya hume hume nehaiye. <sup>17</sup> Nehaiyanagi nagoa veamoya Anumaya Kotitegati kanale amaku amakesa aliteya maa hugahae, Hagote yana amakuafina oniya omale amaku amakesa haviya maigahae. Anile yana nagoamoyaenena nagoke amaku amakesale maigahae. Amaipamoa kanale hinageya nago kanomoma hisia kegeya haviya maineya kalagi aiya kanaleya huya ali kayone humateya mukia veanenena nagoke amaku amakesale maineya amegatila havige havagea aye mavataga ohu veane mainae. <sup>18</sup> Tagayama nagoke tagu tagesalema maisunana yuna heta maisuna yana lagupina augafaaene alaga failmalesunageno hanenageno Anumaya Kotia muse hisia auava yana kave kana huno falote hugahie.

*Mopafi auava yafema hamaisia veamoya Anumaya Kotina kame hu neatae.*

<sup>1</sup> Tuma nehaya yamoene kema nevaiya yatami-moenena hanateti falote nehie? Age lamahaye nehaya yamoene kanale tamaku tamakesamoenena tua nehayafe kema vai yatamimoa falote nehie. <sup>2</sup> Tamakaya nago yafena aluya hutama age lamahayea nehayanagi ani yama oaliya yafe ani yamona nefana hetama he vaitesaya tamakesale nemaiye. Nagoa veamogami yatela age lamahaye hutetamagi oaliya yateti kea vaitetama tu hu yamoa falote hu nelamate. Anumaya Kotitega ani yafema ke hutama havi okaya yateti noaliye. <sup>3</sup> Alisaya yafema Anumaya Kotitega ke hutama havigayana tamakuamoa havi lamaku tamakesa havitama tamakaitami age lamahaye hisaya yamaage alisaya yafema havigayana anima havigaya yana noaliye. <sup>4</sup> Tamakaya Anumaya Kotina ago ataletama ma mopale yafe age lamahayea nehae. Nagoa veamoya ma mopafi yafema age hamayema hisayana Anumaya Kotina kame lagiya kae neatae. Ani yafena ohavinao?

<sup>5</sup> Anumaya Koti avopina mage huno kae-maleneane Anumaya Kotia Alu Aotage Avamua tagupina ago ategeni maineno ani Avamumoa Havi kavala ohiho. huno tokiyaage huno kava neyagaiye. huno kae-maleneane. Tamakaya ani kehena Afa ke nehie. hutama nehao? <sup>6</sup> Anumaya Kotia tagaila kayone hisuna yana kasagoya nelamiafe avopina mage huno kae-maleneane

Anumaya Kotia amaugafa aliya nehaiya veanea kame lagino kae neamateanagi amakaiami

amakuama aliya nohaiya veala kayone yamaa neamamie. huno kae-maleneane.

<sup>7</sup> Ani yafe tamakua alitama ohaitama Anumaya Kotina aiyaafi mainetama Satanifena Kagai kea ohavigahunagi alulega vuo. hutama hisagenoa tamataleno ugahie. <sup>8</sup> Anumaya Koti avatema mime mime visagenoa tamakaienena mime mime eno me lokaeno maigahie. Kefo yama nehaya veamogatama kefo yatamia neataletama tamayana sese hu-taleho. Vagala veamogatama tole lamakesa nehaviya yana neataletama nagoke kanale tamaku tamakesale maiho. <sup>9</sup> Kefo yatamihe tamahaumana halesigetama aviteho. Kigima nehisaya yana neataletama kefo yatamihena ape hutama mainetama havi ya alige fataga huge hutama tamaipa haviya hutama maisae. <sup>10</sup> Anumaya Koti aufina Havi veane mainone. hutama maisayana tamavalesaga huno Ala veane maiho. huno hu-lamategahie.

*Tamafu-tamakana-gamifena Naa veane mainae. hutama hu oamateho.*

<sup>11</sup> Nafunagana-gatama nelamafu-gamifena hutama haviya hu oamateho. Nagoa veamoya nefugamifema Kagaya naa kava nehane. huya fako hutesayana kahegi kemona hu-haviya huteya ali fako hu neatae. Hu neatagi tamakaya Anumaya Koti kemona fako hutesayana ani kea akave omaletama kahegi kemona kaiyeke haviya fako humate veane mainae. <sup>12</sup> Mainagi nagoke kanomo kahegi kea ali falote hu-maleteno agaiage kaiyekema fako hu-matesia kanoa maine. Ani kanoa agaiage veamogami amaku

amamena ali negatino nagoa veanea agola ali haviya humategahie. Kagaya hanaa augafa kano maineka negafugamifena Naa nehane maa nehane. huka fako hu neatane?

*Tamakaya vegano-kanola ohiho.*

<sup>13</sup> Nagoa veamogatama Menifi egafi nago ala kumatega ala mone aliyana nago kafufina moliteta ala monea aligahune. hutama nehayanagi nago kea tamahapaigahugi haviho. <sup>14</sup> Tamakaya egama vayi hisia yafena nohaviye. Tamahaimuma hanea yamoa hanaa kava humaine? Tamahaimumoa siamoma kitenoa aupaa alino tagama hulino motalea kava hinagetama aupaa faligahae. <sup>15</sup> Mage hutama hiho Anumayamoa haisigetahena tagaya tahaimula hanesigeta ma aliyana nealita nagoa aliyaene aligahune. hutama hiho. <sup>16</sup> Hugahayanagi Tagaya na kava hugahune ma kava hugahune. hutamama hayana tamakaitami tamaugafa alitama haisaya ke nehae. Ani kavala tusia havi kavale. <sup>17</sup> Kanale auava yama hisaya yafema havilinesaya veamoya ani kanale yama ohisayana kefo ya nehae.

## 5

*Tusia moneamima hanea veafe humaine.*

<sup>1</sup> Tusia monetamima hanea veamogatama haviho. Tamakaitela hanageke yama vayi hugahema hisia yafena tamakaya kalagi aitama aviteho.

2 Mukia afenotamimoo ago kasaligeno havigafamoya mukia kenatamia ago neya hano humainae. 3 Halayama nehaya monetamia kalogalo hageno ago falute-mainae. Anima faluteno kalogaloma hage-mainea yamoo kefo yama nehaya yana ali falote hulamateteno atama nelea kava huno tamaugafa tesagaligahie. Anumaya Kotia kaiyeke hu-lamatesia kanamoo ago aupaa falote hugahe nehigi tamakaya monea halaya maitama nehigenoo. 4 Haviho hoyatamifina aliya veamogami miyaamia nagoa miyaamia havige hu-matetama noamamiya miyaamimoo hu falote hu-lamateno ke nehie. Anima aliya vayatamimoya kema nehaya kemoo Anumaya Kotia, mukia yamona tusiya huno kava humainea kanomo, agesafina hai falegeno ago haviline. 5 Tamakaya ma mopafima mainaya kanafina kanaleya hutama tamahaiya yamaagela alitetama musena maitama nehagi Anumaya Kotia kaiyeke hu-lamatesia kanafina tamakaila tamaku tamamena tamahae falisiafenagitama kavela nenetama tusinasi vayala ko nehae. 6 Fatago veamoya tamakaila anonatamia hu otamataya veala, ago kaiyekea humatetama hamaeyageya fali-mainae.

*Kana yama falote hisigeta tokiyaage huta maineta Anumayamo esiafe agava maisune.*

7 Ani yafe nafunagana-gatama Anumayati-moma esiafe tamamena malelava hutama agava maiho. Hoyamona nefaa kanale kavemo nena vayima hisiafe amena malelava huno maineno hagoteno aisia kofeene haenaga kofeene agava



mainegeno kanale kavea falote higeno ali-maine.  
<sup>8</sup> Anumayatimo esia kanamoa ago aupa hu-  
 mainegi tamakaienena ania hutama tamamena  
 malelava hutama Yisasife havitama lamakupi  
 malenaya yana atafa hutama lokiya vai-litama  
 maiho.

<sup>9</sup> Nafunagana-gatama nagoa anagafena  
 kalugalu kea vai oamateho. Ani kavama  
 hisagenoa Anumaya Kotia kaiyeke hu-lamateno  
 tamakaila ali haviya hu-lamateyafenagi ani  
 kavala ohiho. Ageho anima kaiyeke hu-  
 lamatesia kanomoa ago fiate hetino maine.

<sup>10</sup> Nafunagana-gatama nayona Anumaya Koti  
 amaune vayamogamina Anumayamo agile kea  
 huhaleya hamanepaigea ani kema nehaviya  
 veamoya amakaila ali haviya hu-matayanagi  
 amamena malelava huya mainayane. Tamakaya  
 ania hutama ani ka kanoale akave hutama  
 vaiyeho. <sup>11</sup> Nagoa veamogamilema kana yama  
 falote higeya amamena malelava huya maineya  
 tokiya vai-mainaya veamoya Kanale kava  
 hu-mainayanagino muse yaamia hane. huta  
 nehune. Tamakaya Yopu kea ago havimainae.  
 Kana yama agaite falote higenoa amena malelava  
 huno tokiya vaino mainegeno haenagaa  
 Anumayamoa kanale yana huteneane. Tamage  
 Anumayatimoa mukia kanafina hau hulateno  
 kalagi ainelate.

*Tamakaya Anumayamo aufina tamage nehune.  
 hutama ohiho.*

<sup>12</sup> Nafunagana-gatama hagote yana maa ohiho.  
 Anumaya Koti aufina ikamo agiene mopamo

agiene ayena nagoyafi naya atalena tamage nehue. hutama ohiho. E. hinutamahena ani keage hiho. Aao. hinutamahena ani keage hiho. Havigu Anumaya Koti aufina havigehe Tamage nehune. hutama hisagenoa Anumaya Kotia kaiyeke hulamategahie.

*Fatagoma huno nemaisia kanomo nunamumoa tokiyaa hane.*

<sup>13</sup> Nagoamo-gatamilema kana yama falote hisigetama Anumaya Kotitega ke hutama havigeho. Nagoamo-gamina amakuamoa musema hisigeaya Anumaya Koti agia yagamefiti alisaga huya maisae. <sup>14</sup> Nagoamo-gatama kali alitama mainesagenoa mono kava vayafe ke hisageya ani kali veatela nunamu me huya Anumayamo agile masavena amaugafale fale-matesae. <sup>15</sup> Havigenuyahena tole amaku amakesa ohaviya Anumaya Kotifema havigesuna yana ago tamigahie. huya amakupi maleneya havigesayana ani kali veamogamina kaliamia alino hano huteno Anumayamoa ali hetimateteno kefo yama hu-mainesaya yama hanesiana Anumaya Kotia aigeamateno atalemategahie. <sup>16</sup> Ani yafe tamakaya nagoke nagokemo-gatama kefo yama humainesaya yafena nagoamo-gami amaule hu falote hisageya Anumaya Kotitega ke huya havigesageno falu lamahaisia yana lamamigahie. Fatagoma huya nemaisaya veamoya huya havigesaya nunamumoa tokiyaa haneanagino mukia veala amaya hugahie. <sup>17</sup> Ilaiyae kanomoa, tagai augafa kano maineanagino tusiya huno nunamuna

mage huno havige-maine Kola ikapinagatila elavino omesie. huno havigeveno tagufa (3) kafugi sikisia (6) ikanagi huno kola oaine. <sup>18</sup> Oaigeno nagoa maigeno eteno nunamu higeno Anumayamo a kola amamigeno nagoa kavela mopafitila falote higeya ali-mainae.

*Veama kama yagalesageta Etetama eho. huta amavalesune.*

<sup>19-20</sup> Nafunaganagatama haviho nagoamogata kelamage kema neataletama visageyama nagoa veamoya eteya tamavalesagetama kanale katema esayana anima tamavaley a tamatesaya veamoya kanale kava nehae. Nagoa veamoya kefo yapima mainesageya nagoa veamoya amavaley a Anumaya Koti katema amatesayana falisaya amaku amamena ago aligati-mainayanagino Anumaya Kotia kasagoya kefo yamaamia alitalegahie.

Kenia male hano hie.  
Nagaini nagia Yemesinae.

**Anumayamo'a Haegafa Alino  
Hagelafilatenea Kea  
The New Testament in the Kanite Language of Papua  
New Guinea  
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

---

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65